

足姫太上天皇崩，然猶文武天皇不改元，至于七年甲子，初改元爲神龜元年。其後六十年，天應元年辛酉夏四月，白壁天皇不豫也。桓武天皇天應元年四月三日受禪，同日卽位，十二月廿日太上天皇崩，其後承和八年辛酉無異事。但自承和七年庚申淳和太上天皇崩，九年壬戌嵯峨太上天皇崩，又廢皇太子以文德天皇爲皇太子，其後六十年，至于今年辛酉也。但唐曆以後，無唐家之史書，仍不得勘合近代之事變。清行去年以來，陳明年當革命之年，至于今年，徵驗已發，初有知，天道有信，聖運有期而已。

一去年秋彗星見事

謹案漢晉天文志，皆云彗體無光，傳日光爲光，故夕見則東指，晨見則西指，皆隨日光而指之，此除舊布新之象也。

一去年秋以來老人星見事

謹案顧野王符瑞圖云，老人星也，直孤星北地有一大星，晉灼曰是爲老人星，見則治平主壽，常以秋分候之，南郊見春秋元命苞，春秋運斗樞曰，機星得和平合，萬民壽，則老人星臨國，宋均曰，斗德應於人者也，文耀鈞曰，老人星見則主安，不見則兵起，熊氏瑞應圖曰，王者承天得理則臨國，晉武帝時老人星見，太史令孟雄以言元帝大興三年老人星見，四年又見，今如此文者，老人星聖主長壽，萬民安和之瑞也，而今先有除舊之象，後有福壽之瑞，首尾相待，事驗易知。

一高野天皇改天平寶字九年爲天平神護元年之例

謹案國史，高野天皇天平寶字九年，誅逆臣藤原仲麿，卽改元爲天平神護，然則非唯天道之符運，又有先代之恒典也。當今之事，豈不仍舊貫乎？

臣伏以聖人與二儀合其德，與五行同其序，故天道不疾而速，聖人雖靜而不後之，天道不遠而反，聖人雖動不先之，況君之得臣，臣之遇君者，皆此天授，曾非人事，義會風雲，契同魚水，故周文之遇呂尚、